



KEMENTERIAN PELANCONGAN, SENI DAN BUDAYA MALAYSIA

**POLISI PENGURUSAN PERCANGGAHAN
KEPENTINGAN**

1. PENGENALAN

Ketika menjalankan tugas dan tanggungjawab sebagai penjawat awam, warga Kementerian Pelancongan, Seni dan Budaya (MOTAC) mungkin berada di dalam percanggahan kepentingan yang menyebabkan mereka tidak dapat bertindak secara objektif dan telus sekaligus sukar membuat keputusan secara adil dan saksama berkaitan urusan rasmi.

2. TUJUAN

Polisi ini dibangunkan untuk memberi panduan kepada warga MOTAC dalam menangani isu percanggahan kepentingan.

3. PEMAKAIAN

Polisi ini terpakai kepada semua warga MOTAC. Polisi ini juga hendaklah dijadikan panduan oleh Pemimpin Kerajaan, Individu Berpengaruh, rakan niaga/ pemegang taruh ataupun mana-mana individu/ organisasi yang berurusan dengan warga MOTAC atau menggunakan fasiliti MOTAC.

4. TAFSIRAN

4.1 PERCANGGAHAN KEPENTINGAN

Apa-apa tingkah laku atau cara yang boleh menyebabkan pegawai membiarkan kepentingan peribadi bercanggah dengan kepentingan awam atau menggunakan kedudukan awamnya bagi faedahnya sendiri, saudara atau sekutu.

4.2 WARGA MOTAC

Merujuk kepada pegawai dan kakitangan yang berkhidmat di MOTAC sama ada melalui lantikan tetap, sementara, sangkut, pinjaman, kontrak atau sambilan termasuk lantikan politik.

4.3 SAUDARA DAN SEKUTU

Merujuk kepada tafsiran "saudara" dan "sekutu" di bawah Seksyen 3, Akta Suruhanjaya Pencegahan Rasuah Malaysia (SPRM) 2009 (Akta 694).

4.4 ANGGOTA PENTADBIRAN

Merujuk kepada tafsiran "Anggota Pentadbiran" di bawah Fasal (2), Perkara 160, Perlembagaan Persekutuan.

4.6 PIHAK KETIGA

Kontraktor, vendor, pembekal, organisasi, rakan strategik, persatuan, Badan Bukan Kerajaan (NGO) atau mana-mana pihak termasuk individu perseorangan yang berurusan dengan MOTAC.

4.7 URUSAN KERAJAAN

Semua urusan Kerajaan seperti perolehan, pengurusan sumber manusia, permohonan kelulusan pelesenan, kelulusan permit, pinjaman, biasiswa, kewarganegaraan dan sebagainya.

5. PERNYATAAN POLISI

- 5.1 MOTAC sentiasa bersedia memberi komitmen sepenuhnya untuk memastikan integriti, tadbir urus yang baik dan ketelusan menjadi tunjang dalam penyampaian perkhidmatan kepada masyarakat.
- 5.2 Selaras dengan usaha dan komitmen tersebut, semua warga MOTAC adalah **dilarang** untuk:
 - i. mempunyai kepentingan peribadi/ kewangan dengan pihak ketiga yang terlibat dengan apa-apa urusan rasmi di MOTAC;
 - ii. menyalurkan apa-apa maklumat terperingkat berkaitan MOTAC yang membolehkan pihak ketiga mendapat manfaat dalam apa-apa urusan rasmi di MOTAC;

- iii. menjalankan apa-apa bentuk transaksi dengan menggunakan akaun peribadi dengan pihak ketiga yang mempunyai urusan rasmi di MOTAC;
- iv. menerima yuran /komisen /apa-apa barangan bernilai daripada pihak ketiga yang mempunyai urusan rasmi di MOTAC;
- v. menggunakan kedudukan rasmi untuk mengembangkan kemajuan kerjaya atau perniagaan saudara dan sekutu di MOTAC.

6. PENGISYTIHARAN KEPENTINGAN

- 6.1 Warga MOTAC yang mempunyai percanggahan kepentingan dalam mana-mana proses kerja hendaklah mengisytiharkan kepentingannya secara bertulis kepada Ketua Jabatan.
- 6.2 Ketua Jabatan hendaklah menggantikan mana-mana warga MOTAC yang telah mengisytiharkan kepentingannya dengan pegawai yang tidak mempunyai kepentingan dalam proses kerja tersebut.
- 6.3 Warga MOTAC yang mempunyai percanggahan kepentingan dan terlibat membuat keputusan dalam mana-mana mesyuarat hendaklah mengisytiharkan kepentingannya secara lisan kepada mesyuarat serta meninggalkan mesyuarat tersebut.
- 6.4 Urus setia mesyuarat hendaklah merekodkan pengisytiharan kepentingan pegawai dan tindakan pegawai tersebut meninggalkan mesyuarat dalam minit mesyuarat.

7. PERCANGGAHAN KEPENTINGAN OLEH ANGGOTA PENTADBIRAN

- 7.1 Kod Etika Bagi Anggota Pentadbiran Dan Ahli Parlimen yang dikeluarkan pada Disember 2018 menetapkan bahawa Anggota Pentadbiran dan Ahli Parlimen hendaklah memastikan tidak berlaku percanggahan kepentingan antara jawatan awamnya dan kepentingan peribadinya.

Percanggahan kepentingan boleh berlaku akibat pengaruh dan kuasa yang ada pada Anggota Pentadbiran dan Ahli Parlimen selaku Kerajaan.

- 7.2 Anggota Pentadbiran hendaklah mengisytiharkan kepentingan mereka sekiranya dalam menjalankan tugas-tugas rasmi, mereka berhadapan dengan kepentingan peribadi yang bercanggah dengan kepentingan awam.

8. PEMATUHAN

Kegagalan atau keengganan warga MOTAC mematuhi Polisi ini boleh disifatkan sebagai ingkar perintah dan boleh dikenakan tindakan tatatertib di bawah Peraturan-Peraturan Pegawai Awam (Kelakuan dan Tatatertib) 1993.

Pelanggaran Polisi ini oleh pihak ketiga akan dimaklumkan kepada Perbendaharaan Malaysia, Suruhanjaya Pencegahan Rasuah Malaysia (SPRM), Suruhanjaya Syarikat Malaysia (SSM) atau mana-mana Badan Pengawal yang berkaitan untuk tindakan selanjutnya.

9. PERTANYAAN DAN PELAPORAN

Sebarang pertanyaan atau pelaporan pelanggaran terhadap Polisi ini boleh dikemukakan melalui saluran berikut:

Ketua Setiausaha
Kementerian Pelancongan, Seni dan Budaya
Aras 17, No.2 Menara 1
Jalan P5/6, Presint 5
62200 Putrajaya
(u.p.: Ketua Unit Integriti)
Emel: keng@motac.gov.my

10. TARIKH KUAT KUASA

Pelaksanaan Polisi Pengurusan Percanggahan Kepentingan berkuatkuasa mulai tarikh polisi ini dikeluarkan.

11. PENUTUP


Pelaksanaan Polisi Pengurusan Percanggahan Kepentingan ini mencerminkan komitmen dan kesungguhan MOTAC dalam menerapkan nilai integriti yang tinggi serta mempraktikkan amalan terbaik dalam semua aspek penyampaian perkhidmatan Kementerian selaras dengan Pelan Antirasuah MOTAC 2020-2024, sekaligus dapat mengurus sebarang percanggahan kepentingan dalam melaksanakan tugas sebagai penjawat awam.

12. RUJUKAN

- i) Perlembagaan Persekutuan
- ii) Akta Suruhanjaya Pencegahan Rasuah Malaysia 2009 (Akta 694)
- iii) Peraturan-Peraturan Penjawat Awam (Kelakuan Dan Tatatertib) 1993
- iv) Kod Etika Bagi Anggota Pentadbiran Dan Ahli Parlimen, Jabatan Perdana Menteri yang dikeluarkan pada Disember 2018
- v) Pelan Antirasuah Nasional 2019 – 2023
- vi) Pelan Antirasuah MOTAC 2020 - 2024

"WAWASAN KEMAKMURAN BERSAMA 2030"

"BERKHIDMAT UNTUK NEGARA"



(DATUK WIRA DR. NOOR ZARI BIN HAMAT)

Ketua Setiausaha

Kementerian Pelancongan, Seni dan Budaya

Tarikh : 5 Januari 2022